

## *Waor of niet waor?*

Dick van Bloemendaal, tekening Gerard Schut

*Hele kleine verhaoltsjes die soms warkeluk gebeurd bin en verhaoltsjes die ik uut mun duum 'ezeugen het. Vur julie un vraag, mar vur mien un weet, welke wel of niet waor bin.*

### *Schele Evert*

In de goeie ouwe tiet kwam dur nog un schelleboer langs de deur um de erepelschellen op te haolen, die ze vur varkesvoer gebruikten. De bekendste was Evert van Westeneng, mar zo kende geen mins'um.



Hie werd altied Schele Evert 'enoemd umdat hie bar scheel was. As hie muulde leupen de traonen over zun rug in plaots van over zun wangen. Hie was altied in touw mit zun handkar vol mit schellen en oud brood.

Hie woende an de Engweg waar laoter

Jan van de Poll un woeningzaak had en noen zit daar ut Vloerenhuus. Recht dur tegenover was ut ouwe mannehuus, wat noen Elim is, waar ok de kleuterschool van de juffrouwen Adams en Braaksma was. Mun breurtsje Aolt en mun zusje Marry waren doodsbenouwd vur'um. As ze naor de kleuterschool mossen gingen ze altied gauw deur ut Poepesteegje um niet bie 'um langs te hoeven. De op'escheuten jongens in ut darp pesten 'um vaak, mar daar truk hie zun eigen niks van an.

Ok hulp hie vaak bie Bart Tromp, de greunteboer an de Postweg.

Hie mos dan de boel um de winkel heen opruumen en erepels schellen vur Bart zun klanten, die geschelde erepels mossen hen. Op un keer mos Evert un zak mit kleine erepeltsjes vort brengen, hie liep dur mee te sleupen deur ut darp. Halverwege



werd hie zo meu van ut dragen van die zak piepertsjes vur zun buuk, dat hie um effe neer zette um uut te blaazen. Toen hij uut'erust was, wou hie de zak erepels weer oppakken en

over zun schoer lèegen, dat dreug makkeluker. Mar wat hie ok prebeerde, ut lukte`um niet um die zak over zun schoer te kriegen. Gelukkug vur Evert komt dur net un jong langs lopen die`um effe zal helpen. Die jong griept de zak onder an de beide punten beet en mit un machtuge zwei gooit `ie de zak op Evert zun rug. Mar deur die zwei verliest Evert zun evenwicht en valt mit zak en al op de straot.

De erepels rolden alle kanten uut en Evert mos op zun knieën liggen lobben um alle erepels weer in de zak te kriegen. Onder un hoop gebek op die jong het `ie alle erepels weer in de zak `edaon, en het `ie de zak mar weer vur zun buuk veerder `edreugen. Nao veul gepuust kwam hie bie de klant an en het de erepels of`egeuven en as dank kreeg hie un stuuver fooi.

+++